

Betico Croes: Coy e bandera y sigui lucha

18 di Maart 1983: Aruba ta celebra Dia di Himno y Bandera. Pero na mes momento Aruba ta celebra tambe e noticia cu a yega for di Hulanda. E realizacion di un anhelo, di un lucha. Na Conferencia di Mesa Redonda a keda acepta cu dia Promer di Januari 1986 Aruba lo haya Status Aparte y na 1996 Independencia. E delegacion di Aruba a worde encabeza pa Betico Croes, e homber cu a tene na bandera y a sigui lucha!

Gilberto Francois Croes a nace dia 25 di Januari 1938. Despues di a bishita school basico y a sigui tres aña di estudio na HBS, el a bay Hulanda, caminda na 1959, el a haya su Hoofdakte como maestro.

Pero no tabata como maestro cu Betico Croes lo a drenta historia, pero como luchador pa Libertad, cu e mes no a alcanza di mira.

Aña 1967: e lucha no a termina pa Aruba cu introduccion di Eilandenregeling, cu manera representantenan di Aruba a sigui trece dilanti no a satisface Aruba. Un areglo, cu a significa introduccion di 12-8, e reparticion di asientos den Staten cu a duna base pa malcontento di parti di Aruba, cu no a haya e derecho di apelacion manera a worde priminti.

Eilandenregeling, sin embargo a permiti introduccion di Gobierno Insular di Aruba y na aña 1967 Betico Croes a drenta arena politico y a bira Diputado pa AVP.

Ni dos siman despues

cu Shon A Eman a expresa su satisfaccion cu a alcanza un colegio di Cinco Diputados Arubiano, Shon A a fayece. AVP a perde su lider di hopi aña y problemanan a cumenza tambe pa e partido.


Problemanan cu a culmina na aña 1971. Despues cu a worde anuncia cu Betico Croes a bira lider nobo di AVP, e asunto a bay para dilanti Juez y Betico Croes no a keda lider di e partido.

Dia 9 di Februari 1971 el a funda e partido Movimiento Electoral di Pueblo, MEP, y a muestra cu e lo bay rebiba e lucha y anhelo di Henny Eman, mentor di e lucha pa Separacion.

Cambio estatal pa Aruba tabata e objetivo di Betico Croes, cu a pone tur cos un banda pa alcanza su meta.

NA aña 1971 MEP a haci su entrada den mundo politico hayando 7 asientos den Eilandsraad, pa despues durante 10 aña keda cu mayoria absoluto.

Betico Croes no a asumi ningun funcion den Gobierno, pero den Staten



y Eilandsraad a dirigi e fraccion di MEP y e lucha, cu el a identifica cu un Himno y un Bandera, cu a bira e simbolonan di libertad, cu mester a alcanza den futuro.

Libertad tabata e palabranan cu Betico Croes a

tene dilanti y e necesidad pa continua cu un lucha te final. "Si mi muri coy mi bandera y sigui lucha," tabata su grito.

Libertad, tabata e grito cu el a sclama, preparando caminda pa e futuro estatal nobo. Un caminda, cu a hacie confronta Hulanda, Antillas, pero cu a hibe exterior pa asina vocifera e anhelo di Aruba.

Reino Hulandes no por a sigui ignora e lucha di Aruba, cu a culmina na 1983, ora na Conferencia di Mesa Redonda a keda dicidi cu Aruba lo haya su Status Aparte dia Promer

di Januari 1986.

Poco tabata e dianan pa Betico a disfruta di e reali-

zacion, ya cu algun dia despues, el a keda seriamente herida durante un incidente na Veld di Winston.

Su recuperacion a tuma tempo, pero el a regresa pa sigui duna contenido na e lucha.

Aña 1985 a bira un aña crucial pa Betico. E

ultimo aña di Aruba den Antillas a worde acompaña pa ciera di Lago, pa un economia cu a basha abao y pa trabanonan pa prepara pa Status Aparte.

Betico Croes a keda na timon pero dia 22 di November 1985, mester a entrega 40 por ciento di e cantidad di votos pa el a haya na eleccion di 1983.

Pero esey no ta tur cu 1985 tabata tin prepara pa Betico. Algun rato promer cu aña a cera y e pais Aruba a nace, Betico Croes a sufrir un accidente. Mientras e bandera tabata worde hisa y e himno tabata worde canta pa e pais, Betico tabata lucha entre bida y morto.

E no a recobra conocimiento. Sin reconoce su familiares siquiera, den coma, el a bay Merca, despues Hulanda.

Diaranzon 26 di November 1986 Aruba a wor-

de spierta pa e informe tristo cu Betico Croes a muri na Hulanda.

Un multitud enorme ricibi su restonan mortal na aeropuerto pa despues a hiba Betico Croes na su ultimo lugar di descanso.


Atras a keda e mensahe di un luchador: Coy e bandera y sigui lucha!



E momento cu Betico Croes pa corto tempo a keda proclama como lider y presidente di AVP na aña 1967. Tras di Betico Croes ta mira otro luchador incansable, Benito Giel, cu ta tene un portret di Shon A Eman den su man.



Entierro di Betico Croes: su mayornan, esposa, yiunan, rumannan y otro familiares ta para na su caha. Sacrificio ta loke a marca e lucha pa libertad!



PABIEN
Pueblo
Ariba nos Dia
Di
HIMNO
Y
BANDERA



**CARIBBEAN
MERCANTILE
BANK N.V.**